

VENDIM
Nr. 250, datë 13.12.2021

MBI RISHIKIMIN E VENDIMIT NR. 112, DATË 26.4.2021, “MBI KËRKESËN E SHOQËRISË ‘HERA’ SHPK, PËR RISHIKIMIN E VENDIMIT NR. 34, DATË 4.2.2021, ‘MBI KËRKESËN E SHOQËRISË ‘HERA’ SHPK, PËR SHTYRJEN E AFATEVE TË VENDIMIT NR. 61, DATË 2.11.2007, TË NDRYSHUAR”

(ndryshuar me vendimin e ERE-s nr. 268, datë 14.10.2022)

(i përditësuar)

Në mbështetje të nenit 16, të ligjit nr. 43/2015, “Për sektorin e energjisë elektrike”, të ndryshuar; të nenit 53, pikat 2 dhe 3, dhe nenit 113, të ligjit nr. 44/2015, “Kodi i Procedurave Administrative të Republikës së Shqipërisë”; si dhe të nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i Entit Rregullator të Energjisë (ERE), në mbledhjen e tij të datës 13.12.2021, mbasi shqyrtoi relacionin nr. 151/8 prot., datë 10.12.2021, të përgatitur nga Drejtoria e Licencimit, Autorizimeve dhe Mbikëqyrjes, “Mbi rishikimin e vendimit nr. 112, datë 26.4.2021, ‘Mbi kërkesën e shoqërisë ‘Hera’ sh.p.k., për rishikimin e vendimit nr. 34, datë 4.2.2021, ‘Mbi kërkesën e shoqërisë ‘Hera’ sh.p.k., për shtyrjen e afateve të vendimit nr. 61, datë 2.11.2007, të ndryshuar””,

konstatoi se:

- Bordi i ERE-s, me vendimin nr. 112, datë 26.4.2021, vendosi:

“1. Të pranojë kërkesën e shoqërisë ‘HERA’ sh.p.k., për rishikimin e vendimit të Bordit të ERE-s nr. 34, datë 4.2.2021, sipas kushteve të cituara në këtë vendim, me objekt rishikimi nga ERE pas përfundimit të afatit 3-mujor.

2. Të shfuqizojë vendimin e Bordit të ERE-s nr. 34, datë 4.2.2021.”.

- Në vijim të kësaj vendimmarrje, ERE ka njoftuar shoqërinë duke i sjellë në vëmendje detyrimin për të plotësuar brenda afateve dokumentacionin e kërkuar në këtë vendim.

- Brenda afatit të vendosur në vendimin nr. 112/2021, shoqëria “Hera” sh.p.k. ka përcjellë argumente dhe dokumentacion në lidhje me plotësimin e kushteve të këtij vendimi.

- Nga shqyrtimi paraprak i këtij dokumentacioni, rezultoi se shoqëria ka referuar se është në proces për t’u pajisur me dokumentacionet përkatëse nga organe të tjera shtetërore, siç janë bashkitë, në lidhje me dokumentet e pronësisë apo Agjencia Kombëtare e Mjedisit (AKM), në lidhje me lejen mjedisore. ERE i dërgoi shkresa këtyre institucioneve për të marrë një informacion të saktë, në lidhje me fazën në të cilën ndodhet pajisja me këto dokumente apo leje.

- Bordi i ERE-s, me vendimin nr. 219, datë 27.10.2021, vendosi të shtyjë me 30 (tridhjetë) ditë pune vendimmarrjen e tij, në lidhje me plotësimin e kushteve të vendimit të Bordit nr. 112, datë 26.4.2021.

- Në zbatim të urdhrit të kryetarit të ERE-s nr. 79, datë 9.11.2021, në datën 23.11.2021, në ambientet e ERE-s është zhvilluar seanca dëgjimore me përfaqësuesin e shoqërisë “Hera” sh.p.k., i cili ka sqaruar/argumentuar mbi dokumentacionin e depozituar dhe plotësimin e kushteve të vendimit të Bordit të ERE-s nr. 112/2021.

- Në lidhje me kushtin e vendosur në pikën 3.1, të vendimit nr. 112/2021, që ka të bëjë me kontratat e rinovuara të qirasë me bashkitë përkatëse, për të gjithë sipërfaqen e nevojshme për realizimin e projektit, shoqëria bën me dije se ka marrë miratimin, për fillimin e procedurave, për rilidhjen e kontratave të qirasë së tokës me Bashkinë Pogradec dhe se kjo e fundit ka shprehur interesin për të bashkëpunuar me shoqërinë “Hera” sh.p.k. Shoqëria “Hera” sh.p.k. i është drejtuar bashkive Devoll dhe Maliq me kërkesën për rinovimin/lidhjen e kontratës me objekt dhënien me qira të fondit pyjor/kullosor subjektit “Hera” sh.p.k., në kuadër të zhvillimit të parkut eolik “KAPPET”. Bashkia Maliq ka shprehur gatishmërinë për bashkëpunim me shoqërinë “Hera” sh.p.k., pasi të jenë shlyer të gjitha detyrimet. Gjithashtu, shoqëria ka deklaruar se këto procedura do të kërkojnë përgatitjen e dokumentacionit topografik në formatin e kërkuar

nga Agjencia Shtetërore e Kadastrës (ASHK), dokumentacion i cili nuk posedohet nga bashkitë, për rrjedhojë shoqëria “Hera” sh.p.k. do ta përgatisë këtë dokumentacion me shpenzimet e veta.

Pavarësisht se ky kusht nuk mund të konsiderohet i plotësuar tërësisht, shoqëria ka dokumentuar korrespondencat përkatëse me bashkitë për të filluar procedurën, për t’u pajisur me dokumentacionin pronësor respektiv, në kuadër të plotësimit të kushtit të vendimit nr. 112/2021.

- Në lidhje me kushtin e vendosur në pikën 3.2, të vendimit nr. 112/2021, që ka të bëjë me lejen mjedisore të rinovuar, shoqëria ka dokumentuar në ERE aplikimin e bërë në sistemin *online* nëpërmjet platformës *e-Albania*, për vlerësimin e ndikimit në mjedis, së bashku me dokumentacionin mbështetës. Ky kusht i vendimit mbetet ende i pa plotësuar, shoqëria rezulton se është në proces për t’u pajisur me lejen mjedisore të rinovuar.

- Në lidhje me kushtin e vendosur në pikën 4, germa “a”, të vendimit nr. 112/2021, që ka të bëjë me miratimin e plotë nga Këshilli Kombëtar i Arkeologjisë dhe Këshilli Kombëtar i Restaurimeve, shoqëria bën me dije se po vijon me përgatitjen e raportit të vëzhgimit arkeologjik sipërfaqësor të zonës, me përfundimin e të cilit do të aplikojë në sistemin *e-Albania*, dhe më tej do të jetë në pritje të vendimmarrjes së Këshillit Kombëtar të Trashëgimisë Kulturore Materiale (KKTKM) pranë Ministrisë së Kulturës.

Ky kusht mbetet ende i pa plotësuar pasi për të marrë miratimin e KKTKM-së, nevojitet më parë kryerja e vëzhgimit arkeologjik sipërfaqësor, të cilin shoqëria deklaroi se e ka në proces.

- Në lidhje me kushtin e vendosur në pikën 4, germa “b”, të vendimit nr. 112/2021, që ka të bëjë me dokumentacionin ligjor vërtetues, mbi realizimin e investimeve për zbatimin e projektit eolik, shoqëria “Hera” sh.p.k. ka depozituar në ERE pasqyrat financiare vjetore të përgatitura nga ekspertët kontabël dhe investimet e kryera nga vetë ajo në harkun kohor 2007–2021. Në lidhje me këtë kusht, rezulton që shoqëria ka depozituar dokumentacion në ERE, që vërteton kryerjen e investimeve, në kuadër të zhvillimit të projektit eolik deri në momentin e depozitimit të këtij dokumentacioni në ERE. Në vijim, shoqërisë vlerësohet t’i lihet ende ky kusht, në kuadër të dokumentimit të investimeve që do të kryejë, deri në plotësimin e të gjitha kushteve dhe finalizimin e projektit.

- Në lidhje me shkresën e dërguar nga shoqëria në Ministrinë e Infrastrukturës dhe Energjisë (MIE), konstatohet se ajo ka përcjellë matjet e kryera, me qëllim marrjen e një mendimi në lidhje me nivelin e standardeve të pritshmërisë së kërkuar për zhvillimin e këtyre projekteve dhe se shoqëria ka shprehur angazhimin e saj për të vijuar me plotësimin e kushteve respektive të vendosura nga ERE.

- Në përfundim, shoqëria “Hera” sh.p.k. ka kërkuar nga ERE shtyrjen e afatit të plotësimit të kushteve të vendimit nr. 112/2021, për të paktën 9 muaj, duke u angazhuar që të vendosë në dijeni ERE-n për çdo korrespondencë dhe zhvillim të proceseve në përmbushjen e kushteve dhe të kërkesave të saj.

- Për gjithë sa më sipër, referuar përpjekjeve të shoqërisë në kuadër të plotësimit të kushteve dhe kërkesës së saj për shtyrje, bazuar edhe në përgjigjet që vetë ERE ka marrë nga organet e tjera, vlerësohet se afati prej 9 muajsh, për plotësimin e secilit prej kushteve të vendimit nr. 112/2021, është i arsyetuar dhe duhet të merret në konsideratë.

- Shoqërisë “Hera” sh.p.k. t’i lihet detyrimi që të informojë/dokumentoje në ERE çdo muaj ecurinë e plotësimit të këtyre kushteve.

- ERE ka të drejtë të rishikojë këtë vendim në çdo kohë, në përputhje me përditësimin e plotësimit të kushteve nga shoqëria, apo aktet ligjore apo nënligjore të dala nga organet e tjera.

Për gjithë sa më sipër, Bordi i ERE-s

VENDOSI:

1. Të zgjasë me 3 (tre) muaj afatin e depozitimit të miratimit nga Këshilli Kombëtar i Trashëgimisë Kulturore Materiale dhe me 6 (gjashtë) muaj afatin e depozitimit në ERE të dokumentacionit pronësor, duke filluar ky afat nga data 14.9.2022.

2. Shoqëria “SOT-AL” sh.p.k. të depozitojë në ERE çdo 3 (tre) muaj një progresraport me informacion për investimet që do të kryejë, në kuadër të plotësimit të kushteve të sipërcituara.

3. ERE ka të drejtë të rishikojë këtë vendim në çdo kohë, në përputhje me informacionin/dokumentacionin e përditësuar sipas pikës 2, të këtij vendimi, apo aktet ligjore apo nënligjore të dala nga organet kompetente.

4. Drejtoria e Licencimit, Autorizimeve dhe Mbikëqyrjes të njoftojë kërkuuesin dhe palët e interesit për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti